

PEPA O FAAMATALA

Ua toe tapu'e ma fa'amalosia le Galulue Faatasi o le Komesina ma le Fono Fauautua i le una'ia o Aiā Tatau i Samoa.

Apia, Samoa – 08 Setema 2026

Ua feiloa'i le Ofisa o Sulufa'iga ma le Fono Fauautua mo le ulu'ai taimi, ma le Afioga i le Komesina Fou i lenei Tausaga Fa'aletupe 2026/2027.

Sa usuina mo le ulua'i taimi le fonotaga a le Ofisa o Komesina ma le Fono Fauautua mo Aiā Tatau i lenei tausaga Faaletupe 2026/2027. O lenei ulua'i fonotaga ua faamaufaaailogaina ai le ulua'i feiloaiga talu ona filifilia le Komesina Fou, le Afioga Vui Clarence Nelson ia Iulai 2026. E tusa ai ma le Tulafono a le Ofisa o le Komesina o Sulufa'iga 2013 vaega 39, o lenei Fono Fauautua mo Aiā Tatau e tele le taua o ona tiute i le lagolagoina o galuega ma matupu e tusa ma mana'oga o le tulafono i tulaga o Aiā Tatau i Samoa.

E to'avalu (8) sui o lenei Fono Fauautua, e tofu lava le sui ma lona tomai ma agava'a fa'apitoa i itu eseese o Aiā Tatau ma o latou a'afiaga i saofa'iga ma sosaiete eseese i totonu o le atunuu. O nei sui ua i ai o latou nafa-tausi faapitoa e aofia ai le Fanauiti & Tupulaga, ua tofia ai le susuga i le Fa'afeagaiga ia Rev. Dr Siaosi Salesulu, ma le susuga Audrey Natasha Lee Hang. O le itupā o Tama'ita'i ua tofia ai le afioga Tavu'i Anne Eves Laumea. O le puipuia o tulaga Fa'ailoga Tagata, ua fai ma sui o le Fono Fauautua le fetalaiga Nanai Leiataualesa Mulipola Pologa Ioane. O le tulaga i Itupa Ese'ese, ua fai ai ma sui le susuga Ioimataopunialavaa Vaito'a Toelupe. O Aiā Tatu a Fa'apotopotoga & Fa'atuatuaga, ua tula'i ai le susuga Tafilelea Fifita Leota. O Avanoa Tutusa ua tofia ai le afioga Maiava Iosefa Afele Maiava; fa'aapea tulaga i Aiā Tatau a Tagata e i ai Mana'oga Fa'apitoa ua filifilia ai le afioga Mata'afa Fa'atino Utumapu.

Ua avea lenei ulua'i fonotaga o se tulaga-fa'avae e feiloa'i aloa'ia ai le Komesina ma sui o le Fono Fauautua, ua fefa'asoa'i ai a latou fa'atofala'iga, ma talatalanoa vaega tonu e patino i sui usufono ta'itasi o le Fono Fauautua. A'o fa'agasolo taualumaga o le fono, sa ta'ita'ia ai fo'i e le Vaega Fa'apitoa mo Aiā Tatau (Human Rights Unit) se folasaga i tiute fa'apitoa ma nafa-tausi a le Fono Fauautua, fa'aapea ma le tulaga i le fa'amalosia atili o le lagolagoina o tiute ma le tautua a le Vaega Fa'apitoa mo Aiā Tatau. I le ma lea, sa fai fo'i ma avanoa e fa'asoa atu ai le HRU i galuega ua ma'ea ona fa'atinoina ma galuega ua fuafuaina i lenei Tausaga Fa'aletupe.

O lenei fonotaga o se avanoa ua toe fa'atulaga ai le Ofisa ma le Vaega Fa'apitoa mo Aiā Tatau, fa'atasi ma le Fono Fauautua i se alava'a lelei ma talafeagai mo le aga'i i luma. I le agaga lava mo le aga'i i luma, ua fa'ailo ai fo'i le galulue fa'atasi o nei itutino o le Ofisa, ina ia mautinoa o mataupu ma tulaga o Aiā Tatau i ona tafa e fia i Samoa, o le a talisapaia ma tapu'eina atili e galuega fa'atino a le Vaega Fa'apitoa mo Aiā Tatau a le tatou Ofisa.

---UMA---